

本朝分省人物考

人物考卷之二十八目錄

南直隸常州府二

秦金

夏從壽

陳策

湯沐

葛嵩

張簡

徐問

龔大有

丁致祥

周衝

王問

周金

毛憲

顧可久

楊淮

王穀祥

談愷

唐音

唐順之

黃正色

薛甲

張選  
華察

王瑛

俞憲

白悅

吳性

王立道

林萬潮

萬士和

杭濟

王鑑

周子義

胡濬

吳綸

厲昇

張遜

華 璉

張飛卿

顧憲成

補遺

許 勝

趙 敵

吳 淑

唐天恩

薛應旂

秦 鏜

吳中行

錢一本

孫繼皋

本朝京省人物考卷之二十八

南直隸常州府二

秦金

秦金字國聲無錫縣人童時穎秀不羣見兒戲卻避之端默自若父授之啓蒙諸書退爲家人解卽能了其大義一日父對客以陸續命課一詩金援筆立就滿座驚嘆謂爲神授丁母憂毀瘠如禮自爲立傳丙午二十由儒士赴選自郡邑以至督學御史三試皆第一是歲領南畿鄉薦越弘治癸丑中進士故相徐文靖溥在位召試館職金以父老急歸省不就文靖

愈器重之嘗謂人曰釋褐新進能知忠孝大節不有  
秦氏子耶乙卯授戶部主事委督太倉糧儲明年監  
臨清倉勘順天等府災歉監收長安四門倉及象房  
糧芻剔抉姦蠹撫綏悍嫠尋陞員外郎時邊書告警  
軍食不贍太宰倪岳謂非異才不能急濟乃進爲郎  
中計處糧餉條陳時宜悉中緩急 朝廷謂得人癸  
丑丁父憂正德改元服闋除戶部郎中時戚畹恣驕  
中璫擅權奏討引鹽連袂以攘金持之不可大司徒  
韓文執奏至再其風稍革而嚙者怨金喉邏事者橫  
撫之竟無所得戊辰陞河南按察司副使提督學校

嚴立課程哲於品藻凡所甄拔卒多嚮用朝紳之士  
自郎署以至公卿翹然而賢者半爲門人庚午陞左  
叅政分守大梁道時劇賊劉六劉七等嘯聚亡命長  
驅河洛所過焚城邑殺吏民將薄封丘金先期設備  
繕城堡峙糗糧會叅將宋振提兵南下馳檄邀之翼  
以民兵鼓戰遇賊於陳橋大奮擊之斬賊首若干級  
生擒其魁封丘晏然是歲陞山東右布政使癸酉轉  
左重念民遭賊刃極意拊循凡勢要請託翔價賣鈔  
等蠹民數享卽日禁除民大感悅甲戌陞都察院右  
副都御史巡撫湖廣釐理軍務挾二僕以從所至問

疾苦誅姦貪威讜惠流奏上便宜八事繼上十事皆  
艱危切務巨盜盤結四面蜂起乃擒賀璋廖琪於江  
討徭畚於彬桂靖叛苗於香爐峰其功最著己卯逆  
濠告變大駕親征中官李鎮附麗彬賊橫肆誅求禍  
且不測抗辭直奏請以一身當之民免於毒庚辰陞  
戶部右侍郎辛巳改吏部尋改戶部左攝部事清理  
勲戚莊田禁革勢要鹽引創籍勾稽兩直隸十三省  
逋負國用漸充先是柳桂功成陞俸一級廕一子爲  
錦衣衛世襲百戶金疏辭免 世宗嗣位錄舊勞賜  
之白金彩幣仍晉俸級如初癸未陞南京禮部尚書



尋改南兵部尚書叅贊機務是冬改戶部尚書因條  
陳時政以備國儲凡數事琅琅千餘言丁亥乞身歸  
田 上賜璽書寶鈔乘傳以歸仍命有司給夫廩時  
年六十一大臣暨臺諫皆詣 闕請留既歸言者不  
已章且數十上辛卯復起南京戶部尚書壬辰改工  
部尚書時廟工方殷夙夜在公督事維謹料理有法  
甲午六載考績進太子少保累疏乞歸乙未加太子  
太保改南京兵部尚書丙申年七十據禮引謝奉  
溫旨賜歸既家居賓客過從每語不忘朝廷天下大  
事退率諸孫課其舉子業臨文自爲點竄寓城中有

後樂園山有鳳谷行窩間一造焉退就寢室左右圖書日弄筆墨爲事問遺故人手自勒狀間發之詩歌以相贈答終其身不衰以嘉靖甲辰卒贈少保謚端敏

夏從壽

夏從壽字如山江陰縣人蚤慧好學長以文鳴弘治癸丑西涯李文正主會試置從壽魁選梓其文爲程式乙卯授工部主事分司徐州減役裁費廉能布聞戊午秩滿改戶部四川司歷陞員外郎中兼司醴政有富商賄結巨璫詐言成化間嘗輸粟五萬中鹽河

東久未支部屬從壽往覈直發其好事竟寢承勅理  
山東河南屯田事方就緒以外艱去時大司徒爲山  
東人所侵屯田被籍入官遂劾從壽不請代擅歸從  
壽抗章自辨朝論寤之正德丁卯起復避逆瑾難移  
疾歸旣而聞縉紳在告者多被羅織則強起鄉人有  
出瑾門下者要重賂曰可得美遷從壽笑拒之遂落  
職作樂閑園集賓朋觴詠其中陶陶然樂也庚午瑾  
誅復除戶部廣西司時九峯孫公爲尚書諸司章奏  
事疑且難考多屬之癸酉擢湖廣右叅議丙子冬考  
績便道歸省再疏乞終母養不允戊寅陞右叅政寶

慶守從二吏出入爲奸守與從壽舊僚陰爲祈免從  
壽卒置之法守以劾去榮府歲以清明上隴往返信  
宿費不貲從壽稱制親王不許出郭檄郡行長史司  
竟尼之武廟親征寧藩楚鄰壤也錦衣官校搜捕  
者皆至從壽方攝篆常從容應之時賊江彬甚橫索  
無厭從壽爭之力庇捍爲多辛已擢福建布政使明  
年嘉靖改元轉左海舶踰制巡海者欲沒入之從壽  
曰海鄉以船爲業奪之是驅之爲盜耳已而失船者  
果皆入海暴亂從壽榜招之乃首服時詔赦民田  
租之半計閩中當缺軍餉數月從壽請留歲解銀十

萬兩以克懇疏至再乃得請時有沙姓者爲廉憲屬  
人謠曰地暑偏宜夏布風寒共怨紗簾臺諫遂據爲  
舉劾焉癸未丁母憂服闋復除河南左轄丁亥擢右  
副都御史撫治鄖陽擒巨猾戢罷訟恤貧安富四境  
帖然然以執法不阿爲人伎嫉己丑得命歸聽用乃  
卽黃墅新第剗涉趣園布十景詠而樂之年踰七十  
於所居東營歸全宅命其子勿乞身後恩又於宅左  
構東臯書院踰二年卒得壽七十有五

陳策

陳策字嘉言號蓉湖無錫人弘治癸丑登進士授戶

部主事監通州倉有中貴撓法抗言不避盡清其宿弊而後已陞員外郎中時三邊弗靖軍費浩繁檄往江浙廣東督其逋負訪究豐凶及侵蠹主名爲施通融之法不朞月而咸集陝西告急後同侍郎顧公往備兵食虜退而還擢知饒州府時姚源洞寇與官軍相持五年矣至則一意招撫比以上計去郡洞寇復作 朝廷發兵南下適還先驅入犁壁山連戰數日寇敗散去猶以洞寇復叛追咎前招撫之非是調知嚴州府爲政務持大體不屑細瑣屬邑有銀礦每易聚衆作寇嚴錮之修葺富春山子陵祠登高吊古有

餘思焉陞福建左叅政時汀漳寇方熾鎮巡檄策征之道經同安降其巨寇蘇世浩挾之以臨汀漳先以榜示令其出降至則先降者爭出策撫而諭之因以告其未降者曰吾欲返爾田宅親族爾顧欲肉餵鴟鴞乎衆皆投戈稽首曰惟我公命皆散遣之汀漳安堵如故省城軍士有給糧踰期而譁者或喻之使退曰必得陳叅政榜文策至以利啗其黨而渙之渠魁旣得餘悉勿問策以民苦急徵軍樂早支亂是之由疏請歲留餘銀九萬兩爲軍餉之備論功加俸一級遂遷江西布政左使至則宸濠雖就檻車而地方尚

未寧謚警城墉籍府庫請給銀數十萬以賑凋弊之  
民已卯廢科士有滯才之歎奏請壬午倍額取之棘  
圍旣撤自顧疲憊屢疏致仕浩然南歸終日默坐家  
人侍側唯見風髯蕭然而已

湯沐

湯沐字新之號沂樂江陰人弘治丙辰舉進士試政  
戶部監太倉庫以清慎著譽丁巳出知崇德崇德政  
積弛至則裁決無留務廉問民間利苦罷行之流愛  
於人徵拜山東道監察御史奉命巡內帑錢穀督河  
東鹽池弊端多所釐革繼按山西劾賊吏振士風郡



縣官望風懼伏正德戊辰擢湖廣按察司僉事受命  
取道過家展墓而謫官武義命且下矣於時逆瑾竊  
政而沐清不染俗勇不避難剛不徇物介不趨時遂  
見忤乃有茲謫也至武義如在崇德時有流愛焉庚  
午瑾敗伏誅詔起廣東按察僉事兼督屯田嵯政先  
是奸貪在位多蠹政極力汰除不遺餘力政聲播聞  
壬申遷福建按察司副使明年入覲時邃菴楊公爲  
冢宰最嚴吏治乃應詔薦天下諸司不堪公輔者僅  
十六人沐與焉 上賜綵幣羊酒以示褒顯尋轉江  
西按察使乙亥擢浙江右布政使丁丑轉廣東左布

政使會 世宗入繼大統陞右副都御史巡撫貴州  
癸未改巡撫四川其在浙江毛九寇孝豐在四川芒  
部寇松藩皆率眾平之有白金文綺之賜乙酉拜大  
理寺卿沐素修謹至則凡所審鞫志在奉公嘗語僚  
屬曰法者天下之公苟惟意輕重非示天下以公也  
又曰因情求法故有不可入之刑移情合法則無不  
可加之罪未幾有五臺山人罹重法者父子當殊死  
訟詣京師 上下諸司覆訊三奉讞忤 上意乃與  
顏尚書願壽等並坐免官歸及歸江陰城南有故田  
廬督耕自給且爲園蒔菊數百本花時延客宴賞其

中又間與耆碩爲鄉社取適性坦率不爲鈞距尤善  
汲引後進居嘗暮曾點浴沂之風故號沂樂以見志  
平生孝友天至雖其先人早逝然歲時廟祀孝敬不  
衰撫其弟汭極親愛歷官清白歿之日家無餘財嘉  
靖壬辰卒得年七十有三

葛 嵩

葛嵩字鍾甫號支菴無錫人弘治己未進士授行人  
冊使周遼二藩擢禮科給事中卽劾罷京兆之不職  
者請專官往覈魏國家衆訟田於民久且濫者直節  
挺挺無所避忌是歲之薊州諸倉閱實邊儲多所釐

革還上四事曰謹收納禁饋送抑權貴清屯種皆切  
務也未幾命點團營軍士往貨免與私役者衆伍恒  
半虛其弊蓋久嵩倡同事以狀聞正德改元上法祖  
任相納諫務學四事是冬南都臺省以言事逮至京  
師嵩偕同官申救甚力旣而諸大臣進諫復偕同官  
繼之於是瑾矯旨一日勒致仕歸者三十七人嵩旣  
歸作三宜亭於後圃日手一卷燕坐其中間與同好  
者以詩酒相酌適語及朝政邑事者急浮大白觴之  
瑾旣誅廷議起用而已病不能起矣六十有六卒於  
家

張簡

張簡字允敬號可齋江陰人自少奇穎嶷嶷若成人  
長游鄉校輒試異等名隱起江東以壁經授徒學者  
景附弘治乙丑登進士第正德丙寅奉使嶺表採訪  
孝廟實錄歸授兵部職方主事庚午遷武庫員外  
郎典籍尺籍迄無疎漏時逆豎內專鑾輿出幸中外  
岌岌乃博考舊章旁羅羣策凡于本兵政務靡不究  
心會山東江西蜀陝閩廣盜起警報日至遷職方郎  
中簡夙夜靡遑批荅不暇時有奏對援筆疊疊千餘  
言切中事機推補將領往往得人自是羣盜漸次削

平以勞績加祿四品錫之鍤幣僉謂當有殊擢而以  
執法爲時所忌竟出叅廣藩分守嶺東兼南北二道  
所至威惠並著得旬宣體會天門箭灌三洞賊首雷  
白眉等合兵稱亂南甸騷動簡以鎮巡交薦握符攻  
討乃遺將練兵密授方略多得招降脇從之民撫而  
用之以廉虛實以爲鄉導分兵八路以扼其吭全師  
直擣以摧其堅俘獲甚衆上功天府未及報銓曹以  
老疾移之致仕哂曰吾志也亟趨裝歸壬午以前功  
詔進亞中大夫階三品時兩尊人皆白首具慶色養  
朝夕務得懽心暇日闢圃鑿池雜蒔花竹每致朋舊

鵬詠其間於世味泊如也平生孝友天至與人交和而能敬雅好學博極羣書凡天官堪輿律曆星數之學靡不涉獵爲文出入韓柳詩法唐書逼真晉帖至老猶手不釋卷云春秋七十有一

徐問

徐問字用中武進人弘治十五年進士除廣平府推官召爲刑部主事歷車駕郎中出知登州以才劇調臨江二州之地瀕江海林莽菁深椎埋剽盜馮爲淵藪問以方略招撫擒獲亡慮數千增築臨江壞堤凡七十二處行者安之鹽運司易污染人咸不樂官此

問欣然受長蘆使之命曰吾將以薄躬清是官也歷長廣藩能以身任一方利害蠙珠真香產於嶺南中使採獲不中巡按御史憂之將以責諸賈問爭曰珠池有禁如是不趣賈爲盜耶惟令所產而獻某不敢避罪竟蒙鑒宥是歲入覲吏部首以才廉列 上與賜章服擢右副都御史撫貴州獨山土酋蒙鉞弑父以叛問提師誓境上親執桴鼓一鼓而元兇就戮捷聞有白金文綺之賜召貳兵部上安攘大計凡八條一時債帥不敢夤緣以入未幾以疾在告者十年詔復起南少宗伯二載進司徒方半載而復歸問自



起家法曹斷獄具文不爲苟比當權倖縱橫雖甚處  
力臨之屹不爲動見上官論事侃侃不阿所蒞之處  
輒先風俗講求禮樂學者見其言與行莫不歎爲復  
見三代遺風

龔大有

龔大有字士謙別號澗松武進人弘治末年登第登  
仕巖邑惠政宜人強梗從化屢被觀風者旌薦擢任  
南臺巡視倉場照刷光祿文卷剗剔姦弊殆盡歲已  
卯濠變聞報卽飛章具達朝廷始得正名討賊武  
廟有龔御史何如人之問尋罷清戎還南臺益共乃

事權姦江彬從史 武宗南巡駐驛留都政厯情過  
人心洶洶大有憂廢寢食倡謀合臺固請回鑾又欲  
以笏擊姦邪不果人多壯之庚辰復奉勅清理屯政  
舊田多爲豪強漁獵聞其下車悉首正莫敢隱匿由  
是怨興謗生辛巳夏例當考察坐謫去任拂衣徑歸  
曰吾年已逾知命安能以勛力爲人盈縮懇乞原官  
致仕詔特許之家居日課耕讀暇則拉一二朋舊尋  
幽探勝嘯詠酣暢絕口不言世故或勸其出輒不應  
微曰吾將留不盡者以遺吾子孫耳性好儉約自奉  
未嘗過豐拳拳戒子孫勿以奢敗尤喜講學見姻族

子姓質美可進者輒命題呈稿親加點竄略無倦容  
弟大倫中壬午鄉試從弟大稔登辛巳進士官至憲  
僉嘉靖丙申以疾卒春秋七十

丁致祥

丁致祥字原德別號近齋武進人生而凝重寡言笑  
比長通經以古文辭名於鄉鄉之巨族爭延致以師  
子弟嚴飭規範多所成立正德戊辰進士第授戶部  
主事監居庸德平軍儲出納有方暇與州學諸生講  
究經義諸生憬然改聽當正德時天下多事國用匱  
乏部使四出致祥往閩廣清鹽榷之匿於奸者數十

萬及疏利弊五事於朝多見采納大司徒屬十有三  
分理邦計而陝西署主百官俸給易生訾謗乃其爲  
郎持衡若一人稱平焉歲漕自江達淮至京多滯部  
推督之先興復儀真舊閘專堰利者以浮議沮之不  
顧仍集諸名人碑文附以已見爲錄刻之圖永歲可  
省費萬計而運遂通擢湖廣布政司叅議分守上下  
湖廣荆南道有武弁某犯罪希關節以免竟置之法  
江右有客於楚者保長與仇誣以盜獄成廉其情白  
之湖南歲侵躬自巡省多方賑貸所全活者甚衆武  
岡州民業見侵沒於藩府官校歲久莫能決從容諷

王以利害卽斥令割還之民凡五年詢民瘼爬搔  
革若切於身必去之而後已擢陝西按察司副使撫  
民漢中屬界川陝之交流民逋聚易亂祥平易率物  
釋繫囚按賊吏威懷並行部以無事夏秋淫雨災甚  
民居蕩析檄郡縣盡括帑藏諸羨餘賑之焦勞萬狀  
民得以蘇於是撫按臺交薦之猶在楚也遷河南右  
叅政已酉入覲事竣以引年致仕歸

周 衝

周衝字道通號靜菴宜興人稍長從仲兄衢受尚書  
補邑庠生正德庚午領應天鄉薦明年會試中乙榜

授江西瑞安訓導身率諸士白當道建四門社學萃子弟居業而升其秀者於泮宮旌孝子劉靜以勵風教刻孝經刊誤養正羣書以代口授庚辰用御史徐讚薦銓授湖廣應城縣令朔望則召耆老詢利弊門設二扁署一曰疏通民情一曰願聞已過立十家牌以彌盜賊東建謝上蔡祠以風文學西創常平倉以備賑恤舉邑政之宜若干條白巡撫秦公公曰可以爲式矣俾榜堂左刻遵道錄并謝上蔡語錄心政啓鑰頒訓于民嘉靖壬午以耳疾改邵武教授其教如萬安加密焉創會約以資進修復鄉賢游先生祭蒐

集遺書付厥裔孫景壽督學端峯邵公銳重之與之  
論學及博約知行之說益歎服乙酉進唐府紀善屢  
以正學啓王尋上定志修學以防逸豫又上修德裕  
後十二事而明聖學近正人二條尤切王敬重之乞  
移半祿養母閱歲念母老假使事歸省八月得疾將  
療聞母訃號慟轉亟卒享年四十有七

王問

王問常之無錫人字子裕學者稱爲仲山先生登正  
德戊戌進士授戶部主事出監稅徐州尋以母憂起  
念父樂莘公春秋高疏改南職方主事便養而樂莘

公雅不欲行則承命爲繪扇三十握握書一詩日月  
日一易之如日侍也已歷陞車駕司郎中尋擢廣東  
按察司僉事瀕行過省樂莘公於家自循其裾而歎  
曰吾終不能爲溫太真行至桐江賦詩十二詠以見  
志遂投劾而歸比歸則旦暮侍樂莘公逆意奉向左  
右顧無不得所欲者撫幼弟幼妹如已出曰無以此  
遺翁百歲後憂諸所怡事樂莘公皆此類比父卒世  
遂不復有仕進志退居湖上迄三十年足跡不一至  
城府部使者前後疏薦之不起海內大夫士過必造  
門求識王仲山則署其門曰疾謹謝客嘗書數語於



房曰訓我以道德者吾拜而師之授我以文章者吾敬而受之貽我以清言者吾洗耳聽之求我以詩畫者吾量已以應之告我以家事者吾旣有人以任之語及時事者吾厭聞之語及公府事者隱几不應絕之晚季構亭湖濱寶界山環植竹木華卉疏流泉立奇石其間時時焚名香手周易一卷擁膝兀坐興至則爲詩文或行草書數紙或又時時引紙濡筆和黛墨點染山水人物花鳥問於詩於文於書若畫皆佇興而發不務刻削規矩前人譬之入水泅游赤手奮攫以舟爲馬翛然翰墨蹊徑之外人稱其詩類韋蘇

州書類米芾又類黃涪翁蓋神理所至懸合古法實未嘗斤斤效也名行旣高海內大夫士望之如神龍不可玩狎則爭購其詩若畫寶藏之於是遂以隱操名天下然問故負用世才歷官所至聲輒隆隆起督稅徐州以法裁耗羨米十二三吏胥斗攢咸膠手不得籍氣勢爲奸會獻后梓官下湖湘道淮泗吏執事往返動至旬月問先期督漕舟過徐倉猝指揮若無事者留都額設馬快船七百八十餘艘歲役卒修造至四千餘人謂之幫甲費不貲貧軍坐累轉徙無告有自殺者時問在南兵部發憤白大司馬宋公曰今

縣官不惜數千人之命而惜數千金乎出疏袖中請  
官自出年例銀督造議上報允留都至今便之卒營  
地舊與齊民錯豪勢盤據且百餘年念法之必多巧  
匿爲避罪計乃具爲令縱諸豪自出白而佃之官不  
奪其業營地遂清會有 詔覈武職冒濫按籍爲立  
決去留權貴人請謁噤弗行時北虜歲入盜邊預籍  
武健士以應募人厚其餼比罷歸貲故有餘或請追  
之問悉縱遣去曰人則弗靳其死而靳之餼耶一日  
縣官復下尺檄誰復至者中貴人某守備留都驕甚  
嘗私抵問乞餘軍供灑掃實利其資執不可乃止於

是當事者人人稱王郎中才守超軼倫輩業且竟大用矣以父子臨岐一言攬涕却行其仁孝固可風哉問經學甚邃尤自謂有得於中庸嘗作圖說以授學者負笈從之人人得聞所不聞故所成就多知名士其歿也門人私謚為文靜先生所著有仲山詩選祇役稿原筮齋集崇文館稿若干卷藏於家

周金

周金字子庚號約菴武進人也正德戊辰舉進士擢給事中陞太僕少卿僉都御史轉副都御史致仕家居六年以薦起為副都御史陞兵部侍郎轉右都御

史尋轉左陞戶部尚書爲人闊達警敏自在科中則已練習人情世務章數十餘上度可施行而後言不效迂生躁激爲名也 上數遊幸晏朝上疏請復常朝之規退則躬覽章奏以總權綱亦頗見采納時貴寵用事國儲蠹於冗食金言京糧歲入三百五萬而食者歲乃四百三萬乞痛加澄汰便又言中官以迎佛以織造濫討引鹽暴橫道路又言都督馬昂納女弟後宮外議或云已娠誅昂而還其女後昂雖不罪而女竟被黜在科九年以久次得擢爲太僕金貌瓌偉善議論其在科中每九卿廷議軍機大事邊境要

害衆輒目屬之口對甚辨聞者莫不心慚壬申狼山之捷兵部議有功將士例陞三級金曰不然將士有實職有虛銜有正副叅遊實職大而虛銜反小有管哨管隊實職小而虛銜反大今一例陞級則管哨以下皆可爲督府而叅副以上或止於都司首尾倒置非便衆是之癸酉廷議用兵土魯復哈密極言西邊虛憊而土魯險遠且青海之賊窺伺西寧乃欲遠拯哈密譬之人家囊篋空虛子孫滅獲疲死而盜賊滿門庭將拯門庭之寇乎抑急比鄰之災乎衆曰是則然矣如土魯索金幣何金曰彼能效順國家何愛於

賞不然勦之未晚也已而卒從其議於是衆以金可屬邊事推延綏再推宣府旣家居廷臣交口薦猶尚以邊事也在兩鎮值寧夏甘肅大同三變之後旣素豁達不拘譎有帥臣體裁又善煦愉接下邊人見其詞色旣已心安乃益務寬簡以休嘆帖之嘗欲答一二卒時窮冬多不袴見之惻然曰邊人窘乃若是遂不忍笞而百方爲之招商聚粟廣屯積芻以時給其食使人人有重生之心又爲之葺墩墻以衛其居疏石渠以足其水凡有規畫期於利盡而人不勞邊人益愛之嘉靖甲申金在延綏會大同殺都御史報至

愕然乃開門召諸將吏軍卒盡入環列庭下謂之曰若輩知大同殺都御史乎衆曰知之曰若輩以殺之爲得已耶非得已耶衆叩頭曰狂賊自取族耳尚何道曰不然邊人勞苦甚矣而又虐使之是趣之殺也假令上下素相愛若父子彼將倚以爲命縱授之刃使殺焉其誰忍乎衆大歡呼叩頭退其在宣府總督馮侍郎以苛刻失衆心數爭之不能得侍郎又以引鹽數萬與其私人爲市而平時商人無能得一引者衆固甚怨會諸軍詣侍郎請糧不得且欲鞭之衆遂憤轟然面罵因圍帥府金時以病告諸屬奔竄入院



泣告曰吾在也毋恐卽便服出坐院門召諸把總  
陽罵曰是若輩剝削之過不然諸軍豈不自愛而至  
此欲盡痛鞭之軍士聞其不委罪若屬也則氣固已  
平乃擁跪而前爲諸把總請曰非若輩罪也是總制  
者罔利不卹我衆耳乃從容懇諭以利害衆囂曰公  
生我始解散去而總制自是亦心愧矣延宣皆虜衝  
金內撫軍情外策強敵關城晏閉邊氓緩帶兩鎮四  
五年訖無敗事人益以爲才自金去宣府八年而大  
同復殺總兵據城亂時起巡撫保定矣遂往扼紫荆  
擒大同謀者數人送京師會真定巡按李者有疑疾

入某邑聞銳聲驚以邑令謀已欲杖死之廣平守力  
爭又以守亦謀已至遣吏發卒圍廣平捕守一城盡  
空金聞變星馳往撫定之上章露巡按罪狀而臺長  
庇其屬爲之訟寃復上章力辨廷論竟直金而黜御  
史其以都御史出鎮淮淮當士大夫南北衝地過者  
或不愜所望則益易爲謗然金自如也丙申 章聖  
梓宮南祔始奉 旨由江而諸護行大臣至儀真議  
從陸諸官心知不可而憚於以身任江行之險悒悒  
不敢出語金獨力爭之極言沿江山險路不可通狀  
且奉 玉體馳峻坂上下撼頓萬一 聖情聞之悲

何奈何議論往返數日而諸大臣亦密遣人探沿江  
路果險乃決從江之議以鐵絙維舟行如期至承天  
遂如期以葬沿江千里居人免於伐樹撤屋役夫數  
萬人得無走死山谷中金之力也及爲刑部尚書轉  
戶部益能於其官乙巳致仕歸歸年餘而病卒年七  
十有四性喜讀書雖裨官小史亦用以資其經略尤  
喜爲詩歌羽檄倥偬中率不廢詩上谷漁陽稿皆成  
帙也善字書有晉人風骨其罷宣府家居好獎進後  
輩與人言娓娓不厭與士人言言讀書與俗人言言  
勤業莫不被其教益年五十遂獨居未嘗蓄媵妾教

諸子愛而有法一飲食必有訓既沒 上詔賜葬祭  
贈太子太保謚曰襄敏

毛 憲

毛憲字式之號古菴武進人正德辛未進士選擢刑  
科給事中卽上疏言人主之德莫大於開廣言路優  
納正直時諫官實明方以言得罪憲卽抗疏申救以  
爲不宜塞諫諍之口時大臣有怙勢干內豎權者則  
又刻切申奏之內外咸肅會議中府衆皆唯諾憲獨  
慷慨披折不阿不激聞者聳然又嘗見邊防軍政之  
弛災異水旱之頻乃敷陳古訓疏列遠圖多見采納

冊使荆湘見民居漂溺死徙瘡痍之狀卽具疏馳奏  
又以先儒陳澔有功禮經宜以從祀 武宗西狩諫  
請回鑾兼論建儲雖觸時諱不恤也未幾以耳疾謝  
歸歸而置義田義學教養鄉族施愛孤弱又以祿不  
及親扁其堂曰永思終身不御重味年七十有七卒

顧可久

顧可久字與新號洞陽無錫人正德中進士拜行人  
時 武宗南狩偕同官上疏謂陛下輕萬乘棄九重  
忽垂堂之誠甘馳駿之游縱不自惜如宗廟太后何  
上怒詔廷杖之遷國子學正丁父憂去服除拜戶

部員外郎時大禮議起與張桂議不合復杖之闕下  
已出知泉州府泉好鬻訟且怙勢相傾至則作六條  
以與民約至於獎拔士類尤加意焉王以寧兄弟讀  
書僧舍蒼頭與僧相毆竟撲殺之株連兩生一訊出  
之止坐毆者是秋以寧舉於鄉丁內艱歸免喪補贛  
州府贛當閩廣荆楚孔道商醴往來稅權處脂者不  
能潤一切斥絕之未幾擢廣東副使按行諸郡咨詢  
黎倭出沒之處相其阨塞險阻而爲之備禦躬登絕  
島中盤宛心目繪爲圖說未幾羅活峒黎出劫爲盜  
安圖循亦之窮治之僭厓諸黎五十二部落聞風款

服境內帖然竟被讒免於是杜門却掃絕交當世屨  
跡公府時泛舟梁谿之上振策惠山之陽以取適而  
已文必根理不襲陳言詩有幽深自得之趣所著溫  
陵虔州珠崖在澗諸集藏於家所纂山海圖說迄今  
用之輒效爲軍中指南云

楊 淮

楊淮字東川號果齋無錫人正德丁丑進士選授戶  
部主事差監出納者凡四先京倉次淮安水次繼通  
州倉最後內十庫皆有中官同事京倉胥卒積弊久  
且膠蔓一切革之淮安倉革中官茶果之需江南北

納戶稱快通倉革園基及額外席草之費內庫勤慎清苦無與爲比一茶分悉絕中官供饋雖饑餓不恤也庫夫故有六十人民苦冗役而公不勝蠹奏裁二十人於是楊主政廉介之名藉藉滿朝宁矣會大禮議未決偕同官繼諸大臣後言之越明日伏闕候命衆號慟失聲上怒命執其疏首八人餘皆固伏不起命俱執送詔獄越三日詔杖於廷各三十淮氣體臞弱病創臥一月餘稍愈尋劇竟不起年三十有八耳死之日空囊如洗家人賣屋以斂其繼室周氏先六月病卒尚殯城外子女幼弱幾不克歸大司徒



鳳山秦公爲經紀焉始得歸葬於世墓之次聞者莫不憐之

王穀祥

王穀祥字祿之常州人生有器量童烏之齡卽能屬文選充縣學弟子員文恪王公一見奇之曰吾宗千里駒殆此子矣旣舉進士改翰林院庶吉士後以政府有私詔悉罷之授工部屯田司主事少宰徐文敏薦調考功尋署文選員外明慎銓藻咸當其人時太宰爲婺源汪公鋹專伺政府賢不肖一切倒置每與之忤遂以母老不便北土乞歸侍養 命下予告仍

勅按院覈之遂出貶真定尉蓋以有兄侍母不得緣乞養之例也棄不拜亡何太安人背養居喪敦禮杜門却掃委懷圖史絕戀紛華有田在東郭外課農自給與田父野老談笑移日不知爲吏部郎也撫按諸司交相推薦疏累上未報厥後太宰爲甌寧李公默素重其人諷御史特疏舉又移書所司爲趣駕終不赴隆慶初簡用舊臣超拜南京文選主事地近而易赴僉謂由此可立致崇顯稱疾堅不就衆爲惜之郡守永年蔡公甫下車首書清德表其里枉駕造其廬坐床第間相勞苦口不能語稽首作謝狀越明年戊

辰卒爲詩冲澹而不尚綺靡文亦典雅有則書做晉  
人不墜右軍大令之風寄興丹青追工摩詰之技篆  
籀八體並臻妙品晚抱書癖手自抄錄無間寒暑雙  
校雖大亮之百卷繕寫子孺之三篋刊亡曷過焉所  
纂郡學志并著詩文若干卷行于世性整潔不爲苟  
簡室中器物置必有恒所衣服巾履雖敝無點膩可  
漉足跡未嘗入公府有以事干請者扼其風槩不復  
敢言客有詆人短者以他語亂之慚色而去

談愷

談愷字守教號十山無錫人生有異徵甫釋極厥考

携過夏口墮江漂五里竟不沒坐於沙渚觀者神之  
幼卽奇警有俊譽登嘉靖丙戌進士授戶部主事奉  
詔使閩還丁內外艱服除補原秩權稅河西通商抑  
豪及建白利漕四事聲大起轉員外巡通州倉有外  
戚漁利者請增造船於通惠河疏爭增船五不便乃  
止尋監兌江西督漕儀真並展清譽陞郎中凡守度  
支者八年出爲山東副使適少司馬檄開馬場湖歲  
方大稜同官多役丁夫民苦之愷獨無所役且念可  
因以寓賑乃懸檄募傭發帑受直三日而應役者三  
千人旬有二日而工畢癸酉監臨鄉試會御史以試

錄故譴死愷亦坐謫信宜縣典史量移懷慶推官台  
州同知五遷復授四川副使蜀方有盜警民誣引者  
多竄伏且集爲亂愷至立釋之命復故業羣黨解散  
踰年以參政晉左右轄乃拜右副都御史巡撫南贛  
汀漳時贛賊李文彪海寇徐碧溪等繹騷浙楚閩廣  
間濱海城邑多陷沒者愷乃開布誠信招降文彪以  
制碧溪盡殲之於海捷 上有白金文綺之賜進兵  
部右侍郎兼都御史移鎮兩廣山箐險密蠻寇盤據  
已久忽突發嶺西聯絡新會溪洞四出焚掠殺千戶  
黎元愷畫策分兵進勦而平之是役也兵僅三萬時

甫四旬而蕩平諸巢略定五縣衆方擬諸藤峽之捷而忌者抑其功僅得廕一子時在軍久不勝苦瘁且念母夫人春秋高力疏乞歸享年六十有六

唐音

唐音字希古號克菴宜興人嘉靖戊子鄉薦就選爲雞澤知縣雞澤固瘠邑又比歲旱歉庚戌之秋虜犯京畿近邊方者率當做備差科之擾音爲之均節裁省視民力所急與民財所窘必百計思以紓之而才瞻力勁展采錯事務在必行其志毀譽得失則姑置之嘗言于郡守曰上司各行所見未嘗親覩民之疾

苦故多操切爲事所賴以調停其間者在吾有司耳  
若上司知操切而有司不知調停則民無所措手足  
矣時朝令議買馬民不願鬻於官官必威取之音曰  
吾不忍殉一官以重困吾民也上司督之急請罷職  
民聞爭願出馬半日而馬具肥好更爲諸邑冠蒞任  
一歲而乞休者三一爲市馬一爲牌坊其一則論范  
頂罪情也初巡鹽御史欲爲邑宦劉御史豎牌坊音  
以民窮財詘姑紓其事巡鹽御史檄縣逮主吏杖之  
音遂以病乞歸太府慰諭之數四范頂者邑之巨猾  
也以饗淫險覲橫行閭里間人患苦之至是午夜操

鐵簡馳入陳國卿家因椎國卿而汚其少妻比閭羣  
起縛之音處之如律頂瘦死獄中已而推府疑爲衆  
人所謀卻其獄擬以和姦翻案音具揭論其事且請  
罷斥其切於愛民而以身任事者皆此類也巡鹽御  
史惑商言配鹽斥銀於縣歲溢額若干清軍御史覈  
絕軍產僉民頂軍以實伍音皆以爲不可音於上司  
之言有從有不從皆視民利病苦樂未嘗以文法之  
緩急上官之意指爲趨合故往往以此得罪然真意  
爲民無所矯飾色雖正而不抗辭雖厲而不激因以  
見信者亦多有之其尤難者呂公祠建醮凡有職於



其方者自巡撫而下磨集獨稱病不往時惟同府劉  
與意合音在縣孜孜民事而尤盡心於訟獄徵歛民  
有訟者貯一空匣中吏初不知爲某事也訟者至乃  
發狀決遣之不旬日而事畢以此獄無留人邑無廢  
事其所決遣自杖徒以上當治罪者治之小事擬招  
成案而已不深究也邑中當審差親集應徭者於庭  
據其籍而訊其業苟籍與業不相應則以所收者與  
所開者互相檢察必核實而後已士夫自應免外必  
括其餘業以起役差籍一下百姓受冊者比每年減  
疆半上自數十頃之貲下至一丁一畝之產吏胥出

人之弊一朝盡洗差之輕重與產之高下相應毫釐損益悉得其當一邑無不頌其平後以疾卒於官年五十有五子一舉舉進士仕南吏部有文學名

唐順之

唐順之字應德武進人文行爲學者所宗稱爲荆川先生嘉靖己丑中禮部試第一及廷試遂菴內閣使鄉人索試策欲首擢之而順之以年少筮仕守己當嚴竟不與通置二甲首其榜首則江西羅洪先也一見知其人品甚高因定爲石交授武選主事以幼時嘗竭精神於舉業幾成瘵疾而學問文章未成恐碌

碌仕途無以爲終身自立之地庚寅春疏病得歸值  
母艱服闋改稽勲主事調考功居家時素知有司某  
某賢後取至京以不通關節留滯不得用卽密白其  
賢擢用西臺竟不使其人知之羅峰相改各屬官爲  
翰林部中首舉順之拜編修校對累朝實錄於時王  
遵巖陳後岡高蘇門皆以詩文名當世一見其作心  
服之而未敢以爲然也至其戒行雖苦終少自得之  
趣時王龍溪以陽明高弟寓京師盡叩陽明之說始  
得聖賢中庸之道矣校對完例當陞賞卻不欲受又  
以羅峰愛已將遠其嫌遂告歸張緣是怒以吏部原

職致仕居家三十年不役官府一人不受坊價一緡  
會 皇太子立妙選官僚起爲春坊司諫竟以請朝  
東宮落職歸自是御布袍嘗居宜興山中與諸生講  
學宦于其地者欲一見之無從也居恒喜靜坐樂與  
方外之士遊曰方外之學雖與吾儒不同而其苦行  
堅守洗淨心緣知自求之身者固賢於今之儒也居  
恒於書無所不讀無不精究其妙而於歷算尤精然  
嘗曰文與詩不過應酬之作更看山中靜坐十年後  
文字更何如耳其與人言罄竭底蘊若無所不盡事  
關機要則深沈隱默際不可窺于瑣屑之事若不甚

暹曉至于籌畫世故則辨悉毫芒貌不踰中人而  
天下勢之所至若萬鈞之壓卵處之晏然舉天下之  
所不敢爲不能爲者獨毅然當之嘗自謂當今少一  
竊武子之愚蓋自况也甲寅倭奴起釁流血東南趙  
文華以 上命視師海上順之與陳機略趙歸薦於  
朝以南部車駕主事起之尋陞北部職方員外陞本  
司郎中陞見後卽奉 命查勘邊務繼而視師浙直  
計平賊上策當禦之海外而海道不可不熟乃自江  
陰與嘉興兩次下海泛大洋至鮫門而還未幾春汛  
急自登海船督諸將泊崇明沙沈賊船十三隻斬賊

首百二十級餘賊走三沙陞太僕少卿又陞右通政於時江北巡撫李遂告急胡總制檄總兵盧鏜往援順之以江北陵寢重地乃以三沙賊檄鏜堅守身往江北與李首尾擊賊敗之於姚家蕩又敗之於廟灣場度其勢無能爲復自江北往攻三沙居海中二月竟以鹽鹵之故腹疾增劇方回太倉調遣狼兵而賊乘風雨夜登江北岸矣每以此自愧其斬馘功皆遜不居而胡公竟上之三有白金文綺之賜每與胡公論國家事未嘗不泣下沾襟誓以身許國曰胡公計事先我一着至忠義一念則甚相符合未幾陞僉都

撫淮揚因積勞病甚不能行然以淮揚重地朝方倚任十一月勉強赴官值歲歉請於朝得餘鹽銀二萬兩以賑又自捐俸金令有司以次捐俸易米散各鎮爲粥以食饑民又以淮揚所轄天下要道卽有變於內倭寇乘之貽患不細故於賑濟獨勞心焉時病已甚治軍旅不少休三月登焦山望三江歎曰吾第一臬將使吾病而不能展其能奈何然使一病都堂海中則諸將無敢不下海諸將能下海則敵人自奪氣也欲從太倉取道常居海中行至通州而病不起矣將革猶以爲人與學問未成未了十年工夫自恨時

天晴皎聞天鼓鳴於舟上者三而氣絕

黃正色

黃正色字士尚江陰人登嘉靖己丑進士初令香山  
剖斷如流政聲藉藉調知南海南海爲粵首邑百務  
糾紛正色以敏捷當之無不迎刃解者其發奸摘伏  
多出意表至今有誦其折獄片言者比之包孝肅云  
兼攝番禺猶不足以窮其技公庭清暇撫琴自適而  
已薦爲監察御史嘗劾駙馬崔元內侍鮑忠不法反  
爲忠所訐誣以大不敬逮赴論死適霍文敏以南宗  
伯入總官僚謂鞫官曰鮑忠不法兩臺結舌糾劾者



獨正色一人汝曹阿忠殺正色吾必直之乃得減死  
謫戍遼左隆慶元年召復故官陞太僕少卿請老卒  
於家其子學海登進士歷贛州知府

薛甲

薛甲字應登號畏齋江陰人嘉靖己丑進士選擢兵  
科給事中疏上封事攻排異端甚力時方士邵元節  
以左道得幸親爲肺腑與柄相表裏要結乃甚其黨  
劾甲以佞諛銓部得競進謫湖廣布政司照磨甲初  
有志於聖學至是以所學驗諸行事有未盡合益取  
象山陽明遺書而參伍之合異爲同反博於約克然

有得也陞寧波府通判甲事不避難歷試輒效而詰  
良懲奸尤爲攷疊乙未陞保定府同知再陞四川僉  
事備兵叙瀘解蒙撤累世之仇靖永播方萌之患陞  
江西副使備兵於贛振刷宿偷大張法紀時分宜方  
貴寵而子世蕃干紀亂政諸作奸犯科者率藉嚴氏  
爲城社甲直行一意罔所顧忌遂與嚴忤解任以歸  
杜門靜養斷掃家事一切無得關白自謂平生受益  
者三友一曰貧二曰病三曰患難貧故知節用病故  
知保身患難故知處世學者未有不由此而能有成  
者也又謂一在精中貫在一中約在博中恕在忠中

皆合一之旨此意了了則六經四書與夫大而乾坤  
細而毫芒無非此理皆可一以貫之此學之所以爲  
易簡而非遺棄物理之謂也今其傳者有易象大旨  
心學淵源錄菀文類稿諸集

張選

張選字舜舉號靜思無錫人嘉靖己丑進士令蕭山  
縣道當閩楚要衝素稱難治至則厚儒生興學校尊  
鄉飲別淑慝士論民情翕然向服乃稽冊籍以括畝  
田之多寡較贏縮以均徭役之重輕實惠之及於民  
者種種可紀赴銓擢戶科給事中適 太廟祫祭

上遣勳臣代行選疏極論言傷剴激 上震怒命廷  
杖八十杖折者三已出朝瀕死者再幸獲生還抵家  
養痾禪院授徒瞻親出入徒步當春掩骼埋齒暑月  
施藥療疾隆冬煮糜粥賙凍餒歲以爲常立論不避  
權貴至朋儕相與則肝膽立傾結社碧山與鄉紳爲  
真率會嘯歌觴咏竟日爲歡 世宗大漸遺詔厚卹  
建言諸臣加陞通政司左叅議致仕隆慶戊辰卒年  
七十有五

華察

華察字子潛無錫人嘉靖丙戌進士選庶吉士才名

隆起與同舍陸粲確世故研經義康濟自期而不悅  
于當軸出爲戶部主事督淮安稅盡剔其垢徙兵部  
晉車駕郎中裁郵傳供應數萬以文行推擇爲翰林  
修撰校錄實訓實錄成遷侍讀加正五品服賜金幣  
時郡國數上禎瑞諸儒臣相要奏頌察曰春秋紀異  
祓我何爲而諛耶 皇太子立諭朝鮮所贖珍值萬  
計却弗顧 上欲超用閣臣相李時以察名進同列  
忌之構飛語乞省覲歸飭園池植花竹奉封公徜徉  
其間不問世事久之起故官主應天試拔瞿景淳于  
廢卷高列之明年會元及第爲一代宗工而王世貞

翁大立陳鑿輩知名甚衆其程式文傳誦海內遷侍  
讀學士視南篆相嚴嵩喻意稍遲少宗伯察若弗解  
以親老乞歸二親相繼沒廬居四載不御葷酒如一  
日遂絕意仕進家故素封又蚤貴而天性儉朴食不  
三豆以其羨贍族賑貧敦故舊代舉婚喪倡助築城  
從吏邑令清飛耗得伏田四十六萬門人撫按守理  
于地者欲大馬報無從而家祀五座師中年喪偶卽  
獨居室無侍媵門無雜賓所著巖居稿若干卷

王瑛

王瑛字汝玉先世居石沙而遷無錫因稱石沙山人

初授書於邊進士伯山伯山讓其華采且謂其幼有成人之度辭不能師爲文厭經生類爾力振迅踔厲嘉靖壬午鄉試應天中式三赴禮闈不遇歸則結廬山中潛心大業探討奧眇究明指歸約其閎博以造於深厚爾雅壬辰會試乃成進士授太常博士當是時世宗方興禮樂隆郊社日替秩宗斟酌舊典尋召入臺日司封駁察舉一時論才御史無出瑛之右者而粥粥守官如故也會議南狩瑛與同官疏留已而議竟寢奉勅理冀北山東河南馬政摘抉姦蠹條畫便宜牧事修舉爲直指使者最庚子出按八閩懲

官邪重民命獎恬退禁汰侈崇教化旌孝烈清寺田  
以補虛糧復驛傳以蘇疲邑諸所舉措炳在憲牘海  
邦頌焉歲當大比綜覈嚴密校閱精允閩士無不帖  
服者瑛載髯虎目顧步有威而中實無伎刻簡曠激  
昂緩急必赴不以空乏爲解而實不能阿附權人閩  
中多碧水丹山靈區異境如鵬海鯉湖武夷雲谷使  
節所經必褰帷以廣瞻視於是譏謗叢生及瓜而補  
外之命已下乃謝病南還恣遊名山勝地旬月忘返  
又與鄉士大夫修復碧山吟社家有園林日召故人  
密親琴阮奕博芳辰令節則廣筵合樂華燭飛觴每



極賓讌之娛事繼母則孝養備撫猶子則慈愛周內  
行純謹殆庶幾汜毓滅燾焉豈但以官業詩名著江  
南而已哉所著有溪上集

俞憲

俞憲字汝成號是堂無錫人也嘉靖壬辰進士官至  
臬憲有集若干卷爲詞林所賞憲生平精力在盛明  
百家詩一書計百卷搜剔旣勤詮擇多當其自序有  
曰盛明百家詩予自嘉靖癸亥迄於丙寅始克彙次  
其集蓋盡平生所藏又四歷寒暑乃得詩一百六十  
餘家共詩賦詞一萬七千六百首有奇存之家塾用

詔來裔且以備老景吟諷之資云爾初不敢示諸其人顧當好文之世士多傳說稱誦至有携楮墨固求印刷者或又以重費相購請予不敢當益爲秘藏如在深山石室中也獨念海寓至廣作者日多近承集刻見投或繕所傳示朝夕勤使不遠千里而來若過讓不遑其謂我何且窮探滄海尚有遺珠未經屠門詎稱大嚼是猶閱武庫者未盡其甲兵入寶山者自限於擷取也坐是不能自安益加搜訪昔予有云倘歲月苟延當爲增刻一編俾成全書不然終爲闕典益重區區之過矣是雖酣後贅言不可忘也爰自嘉

靖丙寅迄今隆慶辛未又六經寒暑再得詩百七十  
餘家共詩詞賦萬餘首通前四十九冊並前後目錄  
一冊共成百數庶幾海內興文之士一覽可盡雖不  
免遺珠之詆似亦可供大嚼之歡矣

白悅

白悅字貞夫武進人嘉靖壬辰進士除戶部主事奉  
使入關中與鄠杜王槐埜武功康德涵上下議論留  
數日不能別已而之平涼望北地旣歸遷主客司員  
外已又遷郟中復使江西乃遂登龍虎山奇之聞其  
東卽武夷不遠乃卽又放舟登武夷諸峰詞調旣逸

而又善晉人書兩使還出紀游詩數十篇一時見者未嘗不種種稱絕也悅爲人恢廓而好義與人游有當于心卽解劔捐珮以贈不爲惜卽內所弗合亦陽浮慕之不終拒也以此聲名益顯然亦以此招忌賈禍居頃之改儀制司郎中會天子冊立東宮置官屬補左春坊左司直其年大駕幸承天歸而按劾從官未至者乃謫永平府通判久之轉南京後軍都督府經歷已轉南京吏部驗封司郎中無何復謫河間府通判復轉戶部主事又一歲改尚寶司司丞悅自登第至爲尚寶侵尋二十年官不過六品而尚寶又

開曹不得有所建立恒鬱鬱不樂明年庚戌遂病其  
秋北虜犯京師百司震眩悅臥閣內日引賓客入與  
計擊胡事明年辛亥病篤有詔遷司丞爲江西按察  
司僉事未拜俄又遭論乃遂以司丞致仕

吳性

吳性字定甫宜興人其始爲郡庠生授徒里中修行  
業文動以身訓畫程著式按而行之始終相較不爽  
毫髮年三十七舉嘉靖乙未進士於時仕者方喜躁  
競性獨恥之上疏乞爲校官得河南南陽教授南陽  
人鄙野而尚奇袤卽諸生亦然歎曰教之廢也故然

夫教者徒務責人已乎榜於門盡謝問遺壺漿束脯  
禁不得入已乃察其有志行者禮之資可進者課督  
之婚姻喪葬戒母計資賄用浮屠以次教之冠射諸  
禮士習變焉故事進士就教再期轉胄監三年遷部  
屬性既無貴援又不以資俸自言於人積五年始遷  
南戶部主事而意顧恒自得於次當推揚州關稅乃  
得筦庫不以非序少有怨尤於心久之監浦口倉迎  
父及伯兄養諸官舍父子兄弟飲醴茹蔬竟日相怡  
悅歷員外郎中未幾遭父憂丁未服闋補戶部乞改  
南京禮部主事踰年請告作天真園與朋舊詠遊其

中將遂終身焉既而曰吾本以疾告於出處未明也  
壬子強起補南京車駕主事未上乞致仕吏部寢所  
奏且促之行不得已至南都又疏以請乃予告丙辰  
以期滿至京師改尚寶司丞再上疏乞休固請乃得  
致仕性舉進士二十一年在官不滿二考其慕退處  
甚於人之嗜進而其圖去視求進者加急雖古達人  
隱君無以過也

王立道

王立道字懋中無錫人舉嘉靖乙未進士選爲翰林  
吉士是歲天子躬御文華殿授簡命題校第諸進

士得選者三十人時李文康公在內閣月試吉士凡兩而立道試輒冠其曹由此顯名久之授編修既爲編修列史職曰夫太史之官爲其志一代之故集古先之鑒也乃吾今守其事矣隘而罔識闕而弗修如職何於是卜僻遠居盡括古墳籍刺取今事大者皆牒記門下重撻不時啓蓋自其爲士時日坐一小樓連數旬不下卽宗黨造者莫得睹其面則耽嗜讀書其天性也爲人靜定沉篤蔑世俗靡靡之好旣乃就故邸復榭門著述如曩時不輟居無何病肺同館說之輟業已察其面霜白兩頰銷縮骨稜稜出又說之



歸於是遂疏歸語其友曰脫吾疾瘳以請而得走錫山也將腰斧伐林於海之側羣樵人徜徉足終吾年吾誓與雲霄冠珮絕矣疏上未報而卒年四十三耳

### 林萬潮

林萬潮字養晦號石樓武進人父富兵部侍郎萬潮以嘉靖戊戌進士爲寧波府推官以待郎公嘗守是郡歸請所以治獄者受命而行至則恂恂然不敢以喜怒加人當斷獄務求所以生之者旬日不得不卽斷則相與驚曰一何其肖吾林郡侯也倭夷入貢道出郡中率爭市以鬪當鬪時矛戟攘切官司無敢誰

何獨萬潮出卽釋闢以窺或訊之曰吾畏司理之廉明也未幾丁侍郎公艱去釋服補贛州贛當江廣之衝重商大賈之所往來往爲關權者輒無廉譽萬潮以當代力辭已而檄攝興國其猾胥善巧伺以愚令至是故進敝器以嘗之冀少怒卽得詐爲機利以苛擾細氓萬潮獨不一問左右請易器曰於余甚宜由是猾胥搖手相戒未幾信豐大水當道檄齋帑金賑之聞命卽行是時水初退地卑者猶在沮洳中冒溽暑乘肩輿泥行沿村塢計口給授夜則會數而哀分之率不得寢生活者幾萬人而身則病矣當道顧益

壯其才凡劇難辦事檄以屬之至憊甚猶時時作手  
牘令吏人代爲詰難家人泣諫則曰吾身猶食祿而  
可後事平竟以病卒於宮年三十有八耳卒之日囊  
無餘金篋中止古書數十卷郡守林君爲之經紀焉  
自提督大府而下咸往弔相與痛惜之

萬士和

萬士和字思節宜興人嘉靖辛丑進士選讀中秘書  
試輒高等屬分宜柄政絀之當署諫垣方請部得禮  
部主事乙巳使周藩便道歸省明年丁父艱服除補  
原秩以母夫人故乞南便迎養改南職方員外巳丁

內艱服除改兵部復轉禮部郎中晉江西僉事蒞饒  
疏裁歲貢磁器以千計已晉貴州副使督學政黔故  
箐峒錯壤卽儒生衽戈矛闕疏經術時時進諸生講  
說大義已晉湖廣叅政時三殿工亟採木使者旁午  
四出轂擊於辰沅之道賴經畫調停民得無轉徙晉  
江西按察使已晉右布政尋轉廣南左轄粵民萬里  
轉輸京帑其費不貲條奏徵轉輸費屬計吏領之粵  
民稱便故事藩司一切政務專制於左使右署名而  
已曰朝廷並設兩使若左右手非有所輕重也約分  
日治事以明大體已晉應天府尹屬直指初按粵逆

辭之境上遂行而直指以爲倨銜之悉取諸錢穀籍  
稽其出納無所得則榜掠筦榷吏屬欲以誣引吏忍  
死不服曰萬公飲粵地一勺水耳直指愈怒捃撫益  
亟有香山黃公佐家居養重不可致忽出謁直指直  
指心喜已獨能致黃公也黃曰老夫跡不至公府久  
矣今爲萬公來其人固涅不受緇者也直指恠甚事  
乃寢道拜右副都御史督南餉條上六事嚴考課議  
本折省遠倉處水兌減贖鍰專委任宿弊一清遷戶  
部右侍郎已遷禮左會華亭罷相新鄭當柄遂引疾  
疏四上得予告然身雖歸而名愈重矣萬曆初起用

以少宗伯攝大司成事遂晉禮部尚書條上崇儉數  
事會災祲雜襲又奏杜倖門客懇直汰冗員抑干請  
以回天意時江陵柄國九卿咸出其門下孤子一身  
自落落不相合於是求去甚力竟賜傳歸歸數年而  
歿當其歿也鄧直指適按其地晨坐堂皇見左右侍  
者相向淚承睫詢之曰萬公歿矣嗟乎此豈可聲音  
笑貌取哉

杭 濟

杭濟字世卿宜興人登嘉靖癸丑進士授稽勲主事  
裁節餘糧清稽黃務進副考功協恭同寅考覈臧否

甫正稽勲以親乞歸暮夜有投以千金者峻拒之曰  
吾寧愛此以撓吾素旣遷副使督學於閩崇雅黜浮  
士習丕變爰署司篆情法兼得庭無繫囚當軸銜之  
抑不以聞稍轉右叅提秋試多拔名士漳賊方興督  
餉進征往來彌歲預遏賊謀以克底平分守邵武民  
以大和左叅河南分守南陽地濱湖襄流民豪梗開  
示禮法剖斷無滯執法以抗藩王曰殿下不宜以讒  
殺人濟固不能以殺人媚殿下曲白釋之尋轉右轄  
簡省徭賦民以不擾久之堅疏乞休拂衣而歸兩遇  
推恩進階資善大夫歛迹丘園罕入城邑鄭御史閩

舊知也覓見不得餽金不受嘗諭子封曰人顯達卽  
聲色甲第游佃是好我寧有是耶其清德雅操真足  
以敦薄俗矣卒之前日偕弟花下聯詩飲酒盡歡而  
罷明曉攬衣撫床問霽否忽噤而逝

王鑑

王鑑字汝明號繼山無錫人領嘉靖己酉鄉薦與計  
偕再以病沮益發奮下帷讀不至丙夜不休己未中  
禮部試會丁艱歸授徒於山中又六年乙丑始就廷  
對出知武定州始至下教勅曹掾曰若所不飭以資  
緣爲奸利者有法在刺史所不自飭借脂膏自潤者



神鑒如之衆唯唯莫敢犯法無何郡伍伯以他事揭  
府帖下州氣張甚鑑廷詰之伍伯偃蹇出不遜語怒  
叱曰若豈以守故嚇我耶吾視弃州篆若敝屣耳遂  
收之以狀白守守心不能平然卒無以中之鑑亦不  
爲屈益勵廉節卽徵輸之羨肺石之鍰盡以需官庾  
先是州賦不時入上官動加呵責每勾校則跳他郡  
自匿鑑爲科品賦定程期不筮楚而輸自無後者會  
當審戶衆多務爲欺隱鑑先已廉得其腴瘠主名以  
次甲乙之無敢下上者又以諸賦多名色頭緒綜雜  
苦於徵解乃設爲條編法每歲計受徵者幾何緩若

急者各幾何類爲籍上之按籍以徵咸有次第民間  
舊當種馬解馬入京州長吏走箱籠通長安貴人訊  
必有朱提以先尺一悉箕歛於長賦者鑑曰刺史卽  
不治事奈何剝民脂以自贖立屏之疏請種馬亦第  
齋直以往民甚便焉時有高三畏胡雲鵬等相與爲  
大奸衆咸指目莫敢觸捕械治之有李讓者用註誤  
故陷重辟累年不能決一訊立釋焉視事四年境內  
大治以廉能卓異擢拜吏部驗封主事改文選務以  
精覈行之母下欺母旁撓久之謝病歸會丁外艱服  
除家居者十年始以原官召用除尚寶司卿疏言大

小臣僚牙牌多遺失請出入給繳悉籍記之又封誥所用璽不宜非時輒請歲以三九月施用奏可著爲令詔持節冊封益藩餽遺甚腆謝不受曰使事有職不敢以私拜君王賜也使還以病不任職疏請免不允乞南職乃得南京鴻臚寺卿久之復以七十上疏乞骸骨言甚剴切於是特進官一級以太僕寺卿予致仕家居歲餘而病作所親往視之舉手相勞言笑如平日亡何疾篤且瞑忽張目曰邵公召我遂卒初在孕時父冲山公夢邵文莊偕一僧入舍旣寤而生鑑至是人以爲夢生之驗云年七十有一所著有五

經摘要楚越記寶界集藏於家

周子義

周子義字以方無錫人爲諸生數不利於有司歸而益勤苦自力旣而歎曰大丈夫乃以一第市耶謂日所啞啞佔俾者於身心有絲髮益否乃日取五經涵泳之已取漢人註疏叅之融融如矣已又取濂洛關閩與薛文清王文成之遺言而體認之稍筆之書其翼經傳者曰穀語其發抒所獨得者日日錄見聞以嘉靖乙丑成進士選庶吉士益習經術明習國家典故章程諸以筆墨事請者弗盡酬也陞編修分校會

試與修 世廟實錄奉冊封 泰寧王餽遺却不受  
分理制誥尋遷南國子司業時所舉士余懋學治南  
垣嘗極論朝政得失於相臣有所譏刺相臣旣已逐  
余而疑疏草出子義手又自始至官及三載考績亡  
一尺蹠以通相臣益銜之六載始轉司經局洗馬萬  
曆己卯主順天鄉試庚辰再分校禮闈遷國子祭酒  
教授諸生以敦行先文藝而釐革奸橐節嗇浮費積  
金錢數千緡拓飭公廨一切不以煩縣官已遷禮部  
右侍郎再遷吏部左侍郎掌詹事府教習庶吉士每  
晨謁必相與論天下大計及祖宗彝訓而後傍及藝

文已爲會典總裁目披手校昕夕不倦蓋夙昔注精  
凝神於此至是務加精蕊追典成比且上而病一夕  
卒矣 上聞訃震悼以會典成序遷特贈禮部尚書  
祭葬俱用尚書恩例謚文恪所集有國朝故實二百  
卷

胡 濬

胡濬字原荆號蓮渠無錫人濬生八歲而孤幼聰穎  
頭顱秀異有力而捷嘗戲緣楹登屋梁坐而誦書母  
闕孺人見之恐驚而墜伺門中旣下笞而泣數之曰  
未亡人不早從地下者徒以兒故兒無賴予安用生

爲泮大感悟持闕孺人泣曰兒自今不奉母教誓所  
以報父者請死乃折節讀書如成人總角補弟子員  
已以教徒自給嘗至乏絕與闕孺人備茹荼蓼矣登  
嘉靖乙丑進士授永豐令永豐巖邑民俗囂好訟數  
起大獄大者隕命小者覆家連歲不解泮至廉其狀  
以本罪罪之多所平反而訟師奸人悉置諸法訟以  
大省禠身以廉卽秋毫不擾細氓僚屬化焉時分宜  
籍沒產散旁邑鬻錢入官他邑多私其上貨而以下  
者予民取上值民大患苦泮一無所私平值而鬻之  
他邑或累月不杜而泮立辦郡守怪其速疑以他財

移入後得其故乃歎服曰吏廉其効如此哉有客邑中者衣冠頗怪譚性命學而辨有口邑中從遊者幾千人縉紳大夫亦往焉淳佯爲過從察其狀有詐乃言於衆曰少正卯之流也立驅之出境士大夫頗少其不好士無何旁郡下檄貌索大盜竟得之講所卽其人也從遊者恥之閉戶不出邑中咸驚以爲神令永豐七月以鬪孺人憂歸邑父老子弟號哭遮道至萬人有書生手抱大豹皮覆棺上泣曰天乎西陵之下北邙之上丘纍纍矣他人不死而死吾明府母以奪吾明府耶淳在事凜操清苦羨贖發以修蔣孝



祠邑人周是修死建文難族黨坐戍頻年子孫調征  
不息力白之臺使者免其軍籍其爲政先忠孝大節  
如此服除再補安福期年入覲至蕭然不能具橐裝  
抵京師徒手謁諸貴人頗怪其簡已乃知安福令實  
廉更相推重之未幾召拜監察御史巡東城首疏論  
中貴人交戟之內相攝以目既而出按遼東會有天  
象示異止車輪無東疏時政數千言幾下於理久之  
得削籍爲編民渚歸貧無以爲家慷慨樂赴人急難  
或有伏冤遍請於當道必爲溷雪之乃已終不令人  
知或有知而以兼金爲壽者必力却之曰吾傷若冤

爲解寧爲金也。至今邑中若馮生盛生鍾生輩其家尚世。世尸祝之。居恒食貧。又雅好賓客。客時滿座上。供具不給。則或質一衣一器。取酒脯而與客。歌呼豪飲。有一技片長。必力爲游揚。以成其名士。以此多歸之客。日益進。而家日益困。人笑而目之。爲黔婁孟嘗。云性好游。卽爲令時。嘗乘一藍輦入武功山。采荔竟日。忘歸。入覲。同行者道相失。則獨登匡廬香爐峯。長嘯而觀瀑布。比覲還。與三山人下錢塘。浮西湖。泊七里灘。拜嚴光先生出偃王墓。下登爛柯山。翛然欲離塵度世矣。比歸里而游。道益廣。梁楚吳越足跡幾遍。

方冠布袍無識其爲故御史者登高陵險饒有濟勝之具每與客捫高嶺峭壁衆方眩慄不自持輕身躍而上竦然離立客自下觀之謂如排風騎氣遂絕天門通帝座矣初見放歸學士華公知其貧捐負郭田二頃餉之謝曰不佞卽貧無賴奈何以逐臣數口累長者後嘗負公賦有司詰之或曰胡公貧甚有司曰胡公數解大獄何爲貧曰胡公所造請非其至戚且友卽冤抑不平者實未嘗私人一金故人待以舉火者不下數十家而胡公家嘗不足客至時時解衣貰酒胡公貧甚有司乃大驚詫之干旄數及又避匿不

肯數見也卒之日薪米盡絕至無舍金須臾會哭奠  
賻者塞塗而至是日有見其由惠山泉負杖逍遙入  
黃公磔者

吳綸

吳綸字大本宜興人風神散朗操履修潔矚然自疎  
濯於世之滋垢非其人雖貴弗與也非其義雖貧弗  
取也非公事未嘗一入城府值好風日或雨新霽肩  
輿行溪山間蒼鹿一白鶴一夾輿馴繞不驚不逸鄉  
人遙望之輒曰吳隱君來也扁舟往來吳越間必載  
鶴鹿自隨至叢林窮壑修篁灌木輒憇終日徜徉吟

哦不令主人知或知之輒奮絕驚去終不言姓名人亦不知其爲誰人曰其古韓伯休之流耶創別墅二於溪山間南曰樵隱西曰漁樂逍遙乎其間自號心遠居士意以靖節自擬也偏嗜茗飲其出必陽羨顧渚非其地者輒能辨之其掇之必晴藏之必溫烹之必法有茶經所不載其爐竈融鬲灰承炭搗火策之屬亦皆精絕古雅甚自貴重坐客四五人勺少許沫餽紛馥三四啜已罄必啜者有餘思始復進終亦不令飲也人又曰其古陸鴻漸之流耶喜作書雖老矣得法書名蹟必日臨數過其書往往爲鄉人取去藏

之間聞古方書製藥餌爲人治療亦多奇效家產不踰中人至義事爭先爲之歲饑富家多閉糴以牟利獨開廩肆糴以賑饑或稱貸數負之又數給之不吝人犯之亦不校邑有蜀山昔蘇文忠公嘗居焉拓地築室春秋饗祀至於今故太僕少卿李貞伯有卜居陽羨之意分田宅招之至蘇必過沈石田流連浹旬乃去餘無所詣

厲昇

厲昇字文振別號雪菴無錫人由縣學諸生升太學選青田知縣致其事歸鄉士大夫以其有善政於青

爲也因稱之曰青田君自爲諸生耿介不妄言笑於  
辭受雖小不苟論事是非人賢否執所見不少徇人  
故或迂之或固之而識者謂其有古人風青田居萬  
山中與福建接壤間更葉寇民貧以猾號稱難治昇  
初至民有周姓者與磐石衛軍某訟五年矣昇聽之  
數語遂服出而哭曰厲公早至豈有是久獄哉邑八  
都地報銀礦發監司臨焉議歲以貢有術者謂山水  
潤秀所產必廣昇直前曰吾聞金能尅木信若人言  
金氣盛矣水何得秀潤如此監司猶未信同官勸昇  
從之昇曰如吾民何申辯數四必寢乃已鎮守中貴

歲以礦一至其邑所費不貲昇於饋不缺禮而已至  
其他費歲率省昔之半由是民安其業乃勸學興賢  
旌舉節孝禮文亦彬彬焉先是屢欲請老輒留於民  
適朝京師故得遂請民聞之欲追留之而已至家矣  
於是旣爲立碑復建祠祠之及沒衆設祭哭於祠所  
著有雪菴集

張遜

張遜字時敏號鈍軒無錫人二十四舉應天鄉試明  
年會試歸益力學越再試乃入太學卒業文譽日起  
遭父喪服闋又再試遂就選授同安知縣時同安缺



官六年帑有隸銀若干兩或勸其悉取之乃盡以充備荒糴本民稱其廉期年而政成縣東海上有五戍戍長擾民且弗受禁嚴以束約之而止內侍某族大而驕人告侵其園田遜立正之一時荒政遜爲稱首曰此何足稱荒在備耳乃建倉勸民以廣其儲擇耆老有行者司之至今不廢民葉宗發以豪干法走避嶺下族人往往負稅有死於獄者簿其丁升分勺別旬日卽稅完尋以治邑高第擢福寧知州福寧亦濱海多盜選能者責捕之軍豪張某素負力撓法至是歛跡餘悉帖服乃定役法民七軍三井井不紊未數

月以內艱奔歸服闋改涿州涿州在京師西南爲天下極衝使者絡繹應接不暇而地多宦者家尤號難制前守率以劇廢政遜處劇以預處勢以直不激不促久而安之凡守之務次第修舉安州監生張錦以人命誣宋某株逮者三百餘人數年未決撫按檄以勘覈比至一訊而獄立決任丘謝令徑捕張指揮下獄訟之且欲搏之死撫按亦以屬之數語而解公暇纂修郡志質於宮詹陸公公歎其敏旣而有福州之擢至福三月理舊務未完者千餘事發解戶以官物私販者五百餘事舊收十邑餘錢助附郭軍需卽革

去夏定驛遞夫以逸補勞民大稱便福在閩爲會府  
鎮巡諸司交牒互判遜晨起左右酬應無遺務夜燭  
治官書恒至漏下二十刻始罷城中外多火每躬救  
之或日夜不再食始覺有疾輿而述職過涿之野民  
識遜者奔走相告咸出拜曰今何意復見吾父母比  
至城官屬以下郊迎信宿而去還抵家疾漸亟乃諭  
其子曰吾受國恩不能報汝曹宜力爲吾補之言訖  
而逝年六十四遜歷三官具能其職清勤公敏具在  
疏詞民爲立碑者三曰愛民曰邵金曰德政所著有

鈍軒稿

華 瑄

華瑄字汝德無錫人少積學與弟瑄俱隸學官爲弟子員刻厲自奮旣而瑄舉進士去爲吏部稽勲郎中而瑄七試輒斥循資貢禮部卒業太學選授光祿寺大官署丞大官掌內庭法膳供具浩穰事關中禁倉卒皆從中涓取辦其徒率饕餮驕揚往往憑恃爲姦利稍不厭所欲輒能中人以法瑄周慎詳雅潔廉自將又平實沈厚見者沮喪訖其去無有過舉一時卿僚共相騰譽而瑄已致仕歸矣其後有司復援恩例起之卒辭不就瑄仕雖晚而輒知止足又樂閒曠旣

家居率以良時勝日領客燕遊南昉錢唐北盡京口  
數百里中名山勝境靡不踐歷遐矚高寄黯然興思  
有古逸人之風家有尚古樓凡冠履盤盂几榻悉擬  
制古人尤好古法書名畫鼎彝之屬每併金懸購不  
厭而益勤亦能推別真贗美惡時吳有沈周先生號  
能鑒古時時載小舟從游互出所藏相與評隲或累  
旬不返成化弘治間東南好古博雅稱兩先生焉錫  
山華氏履德植義固多有之要不若珵之篤意古人  
也後以上壽終於家

張飛卿

張飛卿無錫人身頎玉立雙瞳炯炯照人鬚髯奮張  
見者改容然氣岸孤騫不同一世雖時貴言不循理  
必面折之或謂其宜少巽曰天生吾口以出言也當  
言反訥惡用口爲吳元年皇明兵破姑蘇大將軍執  
士誠送京師遣豫章侯胡公帥師圍無錫僞吳將莫  
天祐猶聚土兵固守大將軍遣使諭降天祐殺之大  
將軍傳令胡公曰卽不下可屠其城飛卿往見天祐  
曰吾民不覩天日十二年於茲矣今張氏就縛將爲  
誰守况未必能守耶一城死生定在今夕願熟慮之  
天祐沉思良久曰誠如君言乃縋南城而下走謁胡

公曰無錫亦良民安敢自外聲教但耳目塗塞若罔聞知今明公奉揚天威頓兵城下孰敢不懼某不避萬死特爲士民請命耳惟明公加察焉胡公覩其氣貌非常言復慷慨喜曰君誠福人城不受兵宜也飛卿還叩門呼曰亟開吾事濟矣兵臨城下天祐出降一城安堵不驚民爭歡呼祝誦額手而謝曰張君生我

顧憲成

顧憲成號涇陽無錫人萬曆丙子領鄉薦第一庚辰登第初授戶部主政壬午調吏部丁亥建言降桂陽

州判官戊子陞處州府推官壬辰改陞吏部歷轉至  
選郎又以抗直不容養病歸戊申補南京光祿少卿  
聚徒講學爲一時所宗未竟所施而卒弟允成號涇  
凡癸未進士需次待選卽申救海剛峰建言回籍戊  
子改江西南康教授養病歸壬辰陞國子博士改陞  
禮部主事又以建言降光州判官兄弟並以氣節著  
尤近代所少云

補遺

許勝

許勝字守謙直隸宜興縣人洪武三十二年舉人



樂七年由黃州府訓導擢廣東道御史丁憂復補左  
春坊左司直郎改大理寺評事未幾陞刑部主事建  
言下獄謫戍保安衛尋復貴州道御史宣德元年巡  
按江西陞右都御史巡撫卒

趙敵

趙敵武進縣人景泰五年進士除江西道御史建言  
謫介休知縣尋復職巡按湖廣河南江西累陞按察  
使致仕

吳淑

吳淑字艾夫宜興縣人成化十一年進士由蕭山知

縣選雲南道御史建言廷杖降德陽縣丞陞公安知縣累陞湖廣僉事致仕

唐天恩

唐天恩直隸常州人正德六年知葉縣賊陷城被執不屈遇害 詔贈光祿寺少卿

薛應旂

薛應旂號方山武進人中嘉靖乙未會試第二授慈谿令試諸生首拔袁煒許其大魁天下後果如其言轉南京吏部尋陞浙江按察司副使提督學政試諸生于慈谿得向程許其可發解後得諸大圭卷大奇

之復召向程語曰爾解元爲諸大主奪去矣後放榜諸果發解向居第六其甄別不爽多類此應旂負才磊落不輕許可一時文名與唐順之相峙故語文章宗匠必曰王唐瞿薛云兩浙壬子試錄前後場皆出其手兩浙通誌之成皆應旂所裁定生平著述甚多而文獻通考一書更爲有補于後學

秦 鏜

秦鏜字國和無錫人祖旭隱居敦行旣没而人思私謚之曰貞靜先生父永孚與弟仲孚俱以孝見旌鄉人稱之曰雙孝至鏜而孝愈篤母疾不能起而瘖鏜

以意揣其寒溫饑飽時飲食之便溺起坐鏜自抱持如是者十九年舉鄉試不第遂銳爲終養計竟親沒不仕曰祿不及吾親乃欲以衰年爲子孫竊祿計耶遇寡姊曲有恩禮重節槩厲廉隅不妄交遊足不企公府教子尤篤子孫化之脩文守禮恂恂敬讓不問可知爲秦氏子弟也後子澹孫禾梁皆顯而鏜不色喜唐太史順之以爲有萬石之質行而輔以齊魯諸儒之文學云

吳中行

吳中行字子道號復菴武進籍宜興人隆慶辛未進

士改翰林院庶吉士授編脩養病丁丑除原官時值江陵奪情力陳其不可廷杖爲民癸未起原官歷春坊中允洗馬諭德等官乙酉請告回籍癸巳陞侍讀學士掌南京翰林院事仍請告在籍聽用卒賜諭祭辛丑贈奉直大夫

錢一本

錢一本字國瑞武進縣人萬曆十一年進士由廬陵知縣選福建道御史巡按廣西建言革職爲民

孫繼臬

孫繼臬號栢潭無錫人萬曆甲戌一甲一名授翰林

院修撰給假甲申復除原職乙酉主考浙江丙戌陞  
右諭德兼侍讀丁亥陞右庶子兼侍讀丁外艱壬辰  
陞少詹兼侍讀學士癸丑陞禮部右侍郎乙未推吏  
部右丙申陞左告病庚戌卒繼臯爲諸生時與顧憲  
成同受知于郡守施公以元魁期許孫果大魁天下  
顧亦發解南畿而顧之庚辰成進士又出自孫門下  
繼臯在詞林以含弘博大稱而其中卓有執持鄉評  
亦共推爲長者